

雲

山

日

記

雲山日記卷下

元 京口 郭昇 天錫

至大二年歲在己酉正月初一日 拜親 陳菊田來留以酒章子實來留午酌 陳行之來相拉過其家小飲 回謁朱良卿三酌吳成甫在坐

初二日晴 表叔憫忌 陳舍人真空叟來三酌 雪消初三日泥滑 早賀郭元吉會王應夫俞宜中 次回謁章子實乃尊章司丞相接丹徒戴典史亦至 回謁李行簡乃尊提舉公相接 石民瞻來龔子中續至 晚約陳舍人李四乙耶小飲 夜雨

初四日陰 燒土地紙卜兆吉 石民瞻惠筆 訪房春谷時自杭回會陳大師田白雲三酌 李四乙耶立于後門

前邀入其家小飲

初五日 顧子靜來

初六日 章子實來房春谷後至三酌 子實約余及春谷

到其家小集 大人章君文後至共酌 次同春谷訪李

仁卿留酒

孫胸山後至

路遇盛季高蕭景玉景玉送至冠子巷

南分路

人日早晴 天無片雲 訪堯葵軒會楊古性就問葵軒揀

日 孟宅揀大衣羅 訪因勝昂鶴峯長老留飲辭之食

薑齋麪 見盛親家看羅留三酌 戈君讓盛子中來值

出 楊古性來甘雲卿後至三酌 晚送羅還孟宅染紅

初八日早陰 高子西來章君文續至 焦彥明來 賈仲

傑典史來 章子實來求寫章綵帛宅位牌 東高總管

送屏風四扇求書 施公恕自常州來袖紙二大幅求畫
初九日陰 出回謁洪天錫 次見孟君澤父子同孟子長
回謁高子西施公恕不遇 回謁焦彥明 次回謁戈君
讓不遇 同子長造勝果寺顏大師具茶次入方丈華山
主煮銀杏小酌有張其姓者帶酒直入予別而出 訪房
春谷會田白雲出與子長分路各歸 騎馬訪章子實同
到長安店訪牟景陽孔德永 演 新授臨海主簿自京師來
會趙心甫張仲方二山長別後同子實到蕭景玉家茶罷
各散

初十日晴 回謁賈仲傑 陳茂叔張泰齋來

十一日晴 洪天錫孟子長來 王竹所來 貴監院來
出訪堯子泰爲揀日事會楊趙二兄 見顧子靜知事留

三酌

十二日晴 同謁孟子長乃尊相接會孫湛然 同謁陳茂

叔值出 朱良卿道傍相遇邀茶

十三日晴 盛季高來施公恕後至取竹二紙

十四日晴 春色盎然 同謁盛季高 同陳景南出到市

閒看斷酒榜 次回張泰齋禮 次過千秋橋有陳氏子

翦紙燈懸于門首紙帶十六條其閒作走獸及人物花草

極其精妙牽綰處只如絲髮狀用工五月方得辦此 蕭

景玉來值出 晚章子實來同出看燈邀至其家三酌步

月而歸

十五日 早路學拜殿 訪孟君澤會洪九二哥 陳行之

來求作小竹一紙湯秋厓後至行之約余同秋厓出鶴林

門游張祠及西岳廟回路行之買酒一尊共飲仍呼一老者壓二絃子消遣半日 祭先

十六日晴暖 飯後同仲同弟遊東岳廟 次入靈濟院解后盛季高蘇硯山房仲明同入僧房有一畏吾僧年方二十五卻著江南禪衣游方問道步趨儼然南僧也

法姓月

章子實來五酌 晚同朱選卿橋上看月四顧荒城紅燈數點而已 蔡宣使來辭入京

十七日晴 早見袁國梁縣尉不遇范千三郎具茶 次到蔡郎中 趙仲山張仲方來留午酌同登壽丘見本宗主啜茶

十八日晴 蘇知觀來 陳行之相約同出回湯秋厓禮次同謁張仲方回路行之具午麪 林君昭來約小酌

十九日早陰 趙景明自毗陵遣沈提控來 問候邢竹塹

趙仲山王仲章來送刻漏圖 夜大風

二十日風作 送書與王榮之家託轉寄 訪陳茂叔會史
克誠 訪孟子長 訪章子實三酌于公右後至傳疥藥
方 在杭時借盛親家鈔二笏今已還訖索回元批本日
扯碎訖 晚訪朱良卿解后朱元度講命閑坐半日吳誠
甫亦在

二十一日晴 問候潘堯章會陳景南 訪顧子靜 堯葵
軒來待以酒囑揀日事 洪九二哥孟子長來 同長弟
到普照寺看念藏經王提點邀茶會古厓及浙東二僧

二十二日晴 賈仲傑來酌以酒 龍舟過

二十三日晴 安同舍人自淮州回來見三酌 劉二總管

來留以酒

二十四日晴 李行簡來 張廷玉來爲小弟看脈

二十五日雨 送郝仲明書與楊古性不遇 見張仲方亦

出

二十六日雨 發張德輝書口盛親寄去 夜大雪

二十七日雪到燈後大作 戈君讓盛子中來

二十八日雪止 立契許神香紙

庚戌十二月初一日還訖

二十九日晴 張君玉房春谷來五酌 章子實來

三十日 楊主簿來顧子靜續至袁仲平趙仲山後至 以

木犀象棋一副到報親道院別張君玉道判就付陳又新

書蓋明日入京陳庵主具茶楊希微出紙求書 送字法

與章子實

二月初一日 府學拜殿 耶律經歷下學 師善講書祭
如在祭神如神在是早會花提領新任趙古灘大使陳東
村歸舍雨作 孟正夫同親保下金壇 滿道判來 龔
子中來借王荊公萬言書 焦彥明來 嘉興學正陳汝
梅趙茂元來道曹舜咨致意 鄰婦劉氏爲欠陳舍錢託
其陳令少緩于取索陳舍領余登樓數酌 訪朱良卿會
范仁卿李司服 阮大舅邀茶 夜雨

二月二陰 四哥生日 小集

初三日 四更同二弟到學觀禮 問候邢毅夫會陳東村
乃尊相接 同四哥出見朱敬之 次到張廷玉處取藥
訪章子實不遇 見趙岳甫大使有客不復進 訪余
繼善不遇 訪郭元吉

初四日 章子實來 倪松巖道錄來

初五日晴 出同謁倪道錄不遇 見滿道錄留茶 到安同舍人家 到林君昭書院 以紅羅錢壹定送孟宅 見龔子中不遇 湖溪趙伯可來待以小集 次同到伯可舟邊姚兄留茶

初六日 早請趙伯可早飯倪松巖同集飯已出游孫硯山園見河間李輔道郎中時爲財賦事產在園中德符堂置局整吏牘 同伯可游口隆寺本長老延數酌 同路訪鄭子美陳茂叔俱出與伯可小市分路四哥同行

初七日 到孫園見陳舍爲修埤糧事 華堯章來 甘露伏首座焦山雅首座同觀本心數僧來求書畫蘭就以墨竹屏風面子與伏兄雅首座號澹雲 安同舍人引戴宜

卿來見丹徒典史之子也 斗香

二月八日 早夢得一銀盆兩環繫其上掣之有聲而覺蓋
孟正夫自金沙回扣門聲也得曹彥良書 和華堯章詩
令長弟送去 侍親張祠炷香 次炷西岳行宮香 同
二弟□□□寺 盧元吉來 鄰里醪會爲紀君瑞孫女
不口收淚 趙伯可來值出 晚雨

初九日 趙伯可來待酒午麪 晚見伯可次同見盧元吉
趙五官人亦往

初十日晴 趙伯可相約早飯飯已發書請伏虎林首座引
領作焦山之行虎林聞呼卽至是日春色佳麗江靜無風
到山見謙選中維那次入方丈見尊無能長老留茶茶已
領入具酒煮麪坐者余及趙伯可二僧司官伏首座登山

之頂看塔展目眺望次憇于飛仙亭間見雅澹雲首座選
中煎魚具酒小集酒盡伯可先睡度不可回先遣諸僕渡
江晚陪尊長老虎林澹雲到海門邊看日落一瞬萬頃金
波蕩搖可謂奇觀散步而同尊老既別仍送酒果到澹雲
房小酌次拉虎林選中踏月上羅漢巖訪福東濟禪房佛
燈熒然爐香未過具茗果閑話俯視栖鵲危巢皆在窗下
與二僧月下聽江聲倚樹清論久之一洗城市之塵俗也
夜宿選中房虎林共榻

十一日 四更鐘動大眾諷經宗性海監寺相約食索麪

先赴澹雲首座早飯飯後出紙求書畫 次到庫堂陳暘
谷監寺具三盃辭出登寶蓮閣次上江山偉觀樓觀本心
侍者引了卽休書記來前在徑山伏虎巖徒弟癯而有文

三山人也同赴性海之約坐客余及趙伯可了卽休雅澹
雲陳暘谷伏虎林謙選中集散游朝宗亭留題與諸僧說
詩氣味相投宛勝章句之儒也 次同諸公入蒙堂訪省
微堂和尚登小閣設茗果澹雲復約寫扁 性海具酒三
盃後上船虎林伯可同還 方仲思自吳江來見寄蒜山
舅書以金鱸壽麪爲大人壽

十二日 早寫遊山詩寄虎林首座 到孟宅算還紅羅錢
解后常子正 同謁方仲思不遇七姨婆令新婦袁氏
出拜 路遇趙伯可 又遇孟子長同歸至市閒分路
陳東村來送壽儀 雨作 伯可來值出 二弟冠巾

十三日雨晴 寫香牀還七載之前常州心願 上墳
十四日晴 飯後到表叔呂西厓墳所挂紙 伏虎林同瑛

白石侍者來求作廬山詩留一題 是日二公就余焦山詩

十五日晴 大人壽日 午閒家宴至晚乃散

十六日 侍大人出見昂鶴峯長老不遇 回路見徐耐翁會劉遵道 趙伯可來辭歸金壇

十七日晴 春暖可愛 見鶴峯值出眞首座留茶會焦佑之常維那 章子實來李行簡後至 蘇知觀來 陳都寺送素饅頭 騎馬到甘露寺回謁伏首座伏欲具酒辭之余云本欲聽清論耳初不用此爲禮也次入新古厓房晚出寺門望定波門外桃李紅白遠見焦阜樹石厯厯可數蓋江靜無風故耳

十八日清明三月節晴 陳東村來留早飯 楊舍人來

陳汝梅學正自水北來曹謙所致意 陳菊田來 楊叔
義來 午後同二弟出鶴林門造鶴林勝果二寺

十九日晴 約陳汝梅早飯 顏子固自金陵來拜 章子
實攜其子剋奴來求書值出 訪朱良卿會吳總領聶舍
人 爲章子實書鵲橋仙詞四軸 錢子有來正卿之子
也求書二幅 晚見章子實會于公右 次到丹陽館前
遇王教直學輩 過千秋橋馬上遇高唐劉總管 訪宗
範卿不遇 晚回謁張君遠 雨作

二十日陰 顏仲元來求書 伏虎林遣僧來取證道歌去
到學中

二十一日又陰 陳和父來 晚得張德輝書

二十二日晴 楊叔義張青陽四哥來求牒保充濂溪學吏

送詩與陳汝梅不遇 送德輝書與莫知事乃子保保

收 聶舍人來

二十三日晴 早見陳舍人爲埤糧事 會葉子華 薛良

甫來葉子華來同到孫園見財賦劉提舉張都目分付修
埤事 孟子長來章子實後至陳汝梅亦至 道冲觀徐
知觀來 貴監院來 朱良卿來取靴 春日清明會事
有不如意者悶坐而已 侍大人見汝梅沃已山

二十四日 早聞阮大官人爲酒事到蔡市橋紙鋪問之

陶石民瞻自杭歸就路見之留坐出示摘瓜圖併六朝古
鏡待早飯飯罷耦提領來余別而上馬 沃已山來辭歸

三茅 陳汝梅來辭歸嘉興

二十五日 邢侍郎李八哈郎中來 盧仲益來借馬

二十六日晴 訪朱良卿 晚見陳茂叔顧子靜會茂叔
同謁趙心甫時自杭州歸就問選事報李仲陽王師善至
余馬不及入

二十七日晴 早到路學行

辛巳日同仲弟造普照寺禮趙處士本宗主領上新閣具
茶 訪朱敬之俞景仁路遇葉子華同行至玄妙觀前王
大師具茶會朱信庵 李提舉來值出 送鮮與張君文
父子作別 斗香

二十八日晴暖 訪翼子中不遇是日爲岳氏與李宅過禮
有幹故也 馬過郎二哥藥鋪解后李行簡具茶 早上
城隍祠問籤得不如且守東方祿不久遲遲喜事來之兆
見邢竹塹會陳四官人 貴監院來 賈景顥來求作

範圍歌解敘 晚回謁景顥會盧元吉

二十九日晴暄 章君文來辭赴長山鹽司丞年老遠官有惜別之意 王應夫學正來 范仁卿來 到孟宅爪羅

錢 晚雨大作

三月初一日 游普照寺龍華會新閣上具茶解后陳茂叔初二日晴 同四哥遊普照寺是日天氣晴暖游人甚盛解后趙岳甫張仲方趙仲山楊有之玉提點邀茶 賈景顥送紙求書 陳東村來值出 伏虎林來送焦山諸僧所和詩茶罷伏兄拉出游萬壽寺見謀長老會端都管 顧子靜來

三月三 千秋節早到學行香領眾 見陳舍人不遇 回謁陳茂叔不遇 聞章君文昨日已行見章東叔

初四日雨晴 呂二叔自儀真來 同口哥出見陳舍不遇

次訪林君昭同游龍華庵惠庵主具茶餅閑話 次同

登山岡江山俱可見茲寺不十年而創造已復如此栽種
竹樹蒼翠可愛 次同四哥過長橋游南報恩寺寺僧裕
兄延茶一新土木舍其舊而別作山門佛殿兩廊壯加於
昔聞之歲收米麥不滿三百石而規模若此堂堂郡學歲
收四千而爲鼠輩竊食遠不若緇流之盛也令人浩歎吾
師有靈何時假我以權出一臂力爲吾徒吐氣耶 晚待

呂二叔

初五日 早見陳舍人爲孫七修埤糧米事 呂二叔去丹

陽

初六日晴 晝長無事同仲同弟到靈濟寺訪極古林盛季

高房仲明續至淨監寺待茶 次入登雲寺寺靜闐然無人門徑雖深窈殿堂卻窄狹 次入永安寺問觀音籤
初七日晴 蔡德甫寄書遣惠老來 寫書寄孟子長問杭
省選事 宗居士來陳菊田後至同茶 參政下朱總領
來求曹山長書爲糴米 晚同仲同弟到楊師香堂問兆
吉 是早五哥渡江之揚州

初八日 新任本路學正吳良貴來見婺州浦江人也攜至
顧淵白書

初九日 早飯後送吳學正禮上會士友于三鱸小堂 次
見王思善趙心甫陳茂叔趙仲山石剛中陳副使送吳兄
到其寓所會館客方韶卿茶罷茂叔約王趙二兄及余到
其家具茶茶已乃歸 蘇知觀來求寫茅山記事 常州

葛明甫同錄事司宣差大令似來見 以人事送葛明甫
入北兩見不過託姜生轉達 方韶卿來 陳和甫來

初十日晴 訪朱良卿借說文字韻

十一日 十二日 保福大聖院眾比丘尼求午齋

十三日晴 湖溪趙景明遣沈提控送茶來就爲售馬事得

景明書 前本路塗教授令司子履道來自江西 回謁

塗履道於丹陽館不遇 方韶卿來

十四日 塗履道來 袖詩回謁方韶卿 會吳良貴孟君

澤吳公具餽飽 回路馬上遇雨

十五日 早路學拜殿 馬錄事行香 吳學正講書孔子

曰入其國其教可知也 云云 庾琴隱陪講點爾何如鼓瑟

希 云云 景明二僕騎馬歸湖溪 高子陽來爲揀日事孟

君澤續至郭元吉續至報新文 貴監院來謝齋 出見
余提點新自平江歸會上官道判余繼善蓋君玉

十六日晴 塗履道來 朱良卿來

十七日雨作終日 陳東村來

十八日雨止 買舟下湖溪 夜泊珥村雨大衾裯半濕

十九日雨大作 午後至湖溪見趙東湖趙景明昆仲及諸

子姪館客王敬仲書院小酌 晚飯 宿于樓下客房

二十日雨 寓趙宅 景明待早飯 是日東湖令愛接東

宅定禮留宴於書院坐客媒人潘兄子及敬仲 晚景明

留燈議乃事

二十一日雨 寓趙宅 景明早出商議乃事就晚散仲寫

擇日帖子與常州諸子姪求字法東湖待酒晚飯 夜雷

雨

二十二日雨作不可歸 東湖待早飯 劉仲明相招坐客
路司吏陳子野徐巡檢趙東湖余及潘仁卿鄒提領劉仲
玉期而不至者景明酒散徐巡檢者與蔣其姓致爭 晚
歸景明待飯既出就宿景明長子都官攜酒肴夜酌雨如
傾盆 景明令人灼蠟

二十三日 雨作 無舟可買溪流如箭 寫詩送景明以
四月初三日起程赴虔州明善書院山長 午閒東湖具
酒余及王華甫王敬仲東湖令壻潘兄 潘心月來求書
卦牌就浼卜課 晚景明送出又欲具酒辭之話至夜深
啜茶三盞

二十四日 飯後別趙東湖趙景明言歸 會葉居竹 次

同景明別劉仲明兄弟令乃子君用送至溪邊上船 午
抵金壇縣中壩上水急舟三次上而復下借人夫拽之乃
上 學僕蔣興輩來接 晚泊珥村又雨

二十五日 早發珥村堰與水平不勞車拽 午過丹陽練
湖水出聲如雷震晡時到家自出路至到家七晝夜並雨
二十六日晴 方韶卿來同大人出見吳良貴會趙仲山趙
茂元別後大人約韶卿同游甘露寺登多景樓上千佛閣
伏虎林相延于清虛室小集午麪

二十七日晴 龔子中來 塗履道來 訪普照本宗主留
午麪

二十八日 訪盛季高會房共辰房六哥 拉共辰相伴游
東岳廟解后沈義方同歸至竹竿巷分路 眞空叟首座

來

二十九日晴 盛季高同萬壽寺因無礙首座來見次陪二
公訪朱良卿借絳帖看又觀許道寧松樹二幅秀潤可愛
訪范仁卿不遇 范仁卿周東溪來 次同仁卿到其
園採桑 會嚴四哥

四月初一日晴 早路學殿謁 鄭鵬南廉訪下學路學官
輩同行會王成之奏差 同謁龔子中不遇 見李提舉
會老卒總管趙大使趙子翔卒提舉李提領 同謁蕭景
玉留午麪 林君昭來 郎其之孟希聖來值出 盛子
中下世時年少而有文可惜

初二日晴 見范提領換零鈔 李山泉來 修鋪
初三日 燒白龍王香紙 普照善友二人來上錢修寶塔

佃客劉七二劉七三經省五皆壯夫也不半月皆病死
可傷

初四日 房子通自揚州來見留少集 吉州陰陽教授劉
心天張君遠來 晚回謁房子通不遇

初五日晴 見范提領不遇 回謁劉心天不遇託楊以吾
致意 回謁張君遠不遇 問候盛親家呂姊病 鄰里

諸人醪會爲王二開米鋪與錢者王老劉總管令舅何秀
才朱舍人如崇節約十四五人 訪盧元吉閑話久之會

陸二哥出門遇林君昭同登龍華庵沈國寶亦至曹首座
具茶茶已而下沈兄相邀於鄰家小水亭晚酌數行仍請
洗浴及歸已暮 曹舜咨山長孔天隱教諭章其之王叔
恭自金壇來歇於後屋 初三日侍大人問候徐五乙郎

雪山日記卷下
三
令婿次見龔子中不遇 次見滿道判會史石庵余繼善
觀山谷題彭□□畫魚十幅夏提點物也 連日事有未
就緒者隨事輒忘附錄于此

初六日 早見舜咨天隱其之 張雲心州判經過下訪請
舜咨相見復送於河上登舟

初七日 陳茂叔來 朱敬之來 茂叔就見舜咨會心甫
盛親家來 見盛親不遇盛二哥同出問卜吉

八日雨 會客孔天隱曹舜咨韋其之王叔恭 潘生載酒
初九日晴 以香紙弔徐將仕令婿丁三郎 陳菊田來李
山泉續至 到平准庫見范提領爲換鈔事 宗範卿來
鄭翔遠來 晚見菊田不遇再造乃見 回謁鄭翔遠
祝眞白參政來

初十日 早送丁三郎殯出中土門 陳茂叔來張藥山續
至 李仲陽王仲祥張仲方來 宗耆宿來 曹千二郎
爲賃屋劉府判來 段知事來 曹舜咨置酒坐客大人
孔天隱韋其之王叔恭不期而會者錢正甫茆仁甫
十一日晴 李山泉來待早飯 徐允伯來 陳子野外郎
來 李行簡來 普照善友來勾錢修塔
十二日晴 何經師來王竹所續至 陳媽憫忌日 盛親
家來約到其家小集會陸大使

十三日 燒九里紙 孔天隱王叔恭歸金壇 鄰居王道
士過門報張君玉道判羽化可惜可惜年三十

十四日 何經師過門留早飯 同韋其之出見龔子中
次訪張仲方不遇 其之招飲于范公橋下潘店 過舟

中見段吉甫

十五日 早路學拜殿 朱敬之講書菁菁者莪 石總管
下學 爲其之書字數紙 李山泉來 曹舜咨拉出到
市樓小飲坐客杜五哥楊壽卿余及舜咨共之 夜共舜
咨說詩

十六日 陳舍人相約小酌

十七日 伏首座辨都寺來同見舜咨 何西賓來 聞滿
道錄令師孫王監齋羽化往弔之年二十二謙而好學亦
可惜也

十八日 早送王監齋殯出青陽門外 金壇李叔恭韋其
之來二勺復會于舜咨座上欲相約一出余辭之 石民
瞻來自杭歸 先曾祖省元忌日 晚陪舜咨出見龔子

中陳君實 次見石民瞻會劉府判朱正甫 次見李仲陽

十九日晴 置酒與舜咨午集一麪 回謁李叔恭會蕭舍人見張藥山不遇 李山泉來 晚曹彥高自金壇來
二十日 陳菊田來高子陽續至 趙心甫同令弟趙台叟來 史州判來劉舍人同至袖紙乞書 午延曹舜咨小集侍大人送至河邊登舟 錢正卿相約集坐客曹彥高及余二人

二十一日芒種晴 午共彥高小酌同彥高到高橋修馬鞍
二十二日暄 房春谷來謝道滿道錄之意 同彥高孟正夫上普照寺看繡幡二各長二丈餘平江張總管布施者懸于處士堂興知庫待茶 次同彥高上北固山甘露寺

彥高買果一盤見伏首座會惠首座王提點留午酌二僧
先去是日本寺接使臣賜金襴袈裟門首就見姚推官回
路彥高邀市樓午麵 晚浴罷少涼與彥高路座閑話

二十三日雨 呂二叔自丹陽來

二十四日晴 陳菊田陳靜齋來報新任張教到揚州見

二十五日 陳菊田趙資深來 孟君澤來報杭省選事

二十六日 見張仲舉教授不值 王思善張教二人來

陳茂叔來曹彥高相延開尊 同曹彥高袁敬叔游萬壽

宮 晚見張仲舉

二十七日己卯 到萬和店見郭祥卿新自北歸授廣德照
磨坐上會盛季高章同文同文報余得宗文山長云得之
俞景仁說 是早張教禮任往送之趙資深諸公爲欠俸

米阻押解由與王生陪李仲陽輩送王思善歸

二十八日晴 兀坐無口到普照登楚山閣壁上畫松一株
張居士具午麪宗主及數善友同集 趙資深來

二十九日晴 驟熱 曹雲居相請到玄妙觀雲堂後午集
坐客王雲閑曹彥高余及薛雲山潘上座袁叔明集散同
彥高叔明到勝果寺納涼

三十日 陳菊田來陳茂叔後至 徐卷石自太平教諭滿
歸相訪 俞景仁來報新除 見余繼善會東平孫待詔
時塑玄帝像 訪楊石泉 張廷玉來 趙資深來 爲

酈道判作修靈應道院疏 爲曹上座作化鍾磬疏

五月初一日晴 早到學拜殿 俞景仁高德剛講書 郭
元吉焦彥明來彥明約至其家烹雞小集集散陪二丈到

章同父家分路乃歸 林君昭楊以吾續至 徐卷石來

初二日 早到長巷顧宣使宅送元二朝奉殯出青陽門

回路李仁卿盛季高同入報恩寺覓茶茶已上馬

初三日 王功父來 孟希聖送扇求書 趙資深來

初四日晴

五月五日微雨 祀先

初六日夏至 祀先 到學中會朱敬之何講師 見張仲

舉不遇 見郭元吉會石剛中 薛老來晚見徐吉水借

米

初七日 趙資深來 李山泉來 陳景南來周寬夫續至

曹彥高自金壇來 邢毅夫來說杭省選事 朱良卿

來 斗香

初八日 范仁卿來待午麪彥高同集 訪朱良卿會陳菊
田吳成甫菊田說乃子山長公賣屋事陳公去後良卿出
香印盤一面作三層刁以香印之如層臺之狀妙物也
黃平山司丞自北歸來見 訪錢正卿不遇 晚與彥高
聯轡見黃平山 次訪孟君澤

初九日晴 祖母生日壽麪

初十日

十一日 黃平山來並馬出見薛良卿 次見朱敬之 送
平山至小市分路 曹彥高約出小飲

十二日 聶舍人來約出小飲邀彥高同往 是日聞孟子
長自杭歸報子得饒州鄱江山長 蔣公秉來 石民瞻
來

十三日 早見孟子長問新除 次見蔣公秉新授德清教
諭會房晦叔 曹副觀來求寫清真觀化鍾磬疏

十四日 楊主簿次子來云歸自杭州攜扇求書 是日會
黃平山陳茂叔

十五日雨 午後上城隍祠炷香曹彥高同行避雨于孟子
長家

十六日微雨 朱良卿來

十七日 邢毅甫來 孫提領遣華三郎來取書與饒州楊
正卿問缺事 過朱良卿家借新得香篆看會王道士

斗香

十八日 回謁邢毅甫乃尊相接 到路學會黃平山張仲
舉坐閒聞王思善被軍人捉酒犯禁凌辱于道昨夜已在

逃矣 訪東高千戶不遇 訪郭元吉聞趙德章自杭歸
有新聞往見之不遇會堯子泰楊以吾子泰學生高兄求
書扇二柄 回謁石民瞻不遇 到余直學家尋趙兄不
見而回 到孟鋪買紗送黃平山司丞值雨 曹彥高歸
金壇

十九日微雨 陳茂叔主簿來趙德章續至送到饒州路鄱
江書院山長省劄待以三酌 陳菊田來 盛季高續至
季高歸自常州道乃叔虎林教授致意四月十八日禮任
出見毛聲甫新得松江府上海縣儒學教諭省劄亦是
趙兄帶來者 訪王山意不遇

二十日 方詔卿來留早飯

賀客 趙心甫 徐卷石 孟君澤 鄭子美 明光甫

毛聲甫 焦義明 陳茂叔 陳景南 房晦叔

以果麪出謝趙德章乃叔心甫相接會張仲方王仲祥堯
子泰牟兄善丹青者 回謁盛季高值出 方蒜山次子
祐大師自吳江來見

二十一日雨 連日天氣涼甚可衣袂衣 孟子長教諭來
石民瞻寄所和詩來

二十二日晴 洗衣 金壇蔣興來寄至孔天隱書 訪張
藥山 回謁孟君澤父子 次回謁祐大師于方七姨家

回謁焦彥明時長弟同行 訪朱敬之會章同父 回
謁陳景南 于君璧來求乃兄練塘挽詩 龔子中來

二十三日 回謁鄭子美 次見陳茂叔過朱良卿門留茶
石民瞻續至閑話久之 回謁龔子中 會李行簡 次

訪陳馨林 陳和甫來 蔣興取回書去 伏虎林首座
來值出不及接

二十四日 寫岳祠習狀 張仲舉教授來待羊飯

二十五日 石民贈送紙來寫所和詩 盛伯真邀午集

伏首來求書受戒文 赴盛伯真席坐客丹陽黃壽卿偶
師得郎希顏伯真季高賢昆仲期而不至者石民贈李仁
卿

二十六日 濕熱 蔡松江自廣東英德府歸經過下訪
陳景南來 孟子長來求送行詩

二十七日 侍親上岳祠炷香 倪性堂來 邢竹塹來
朱敬之來待午飯 林君昭來 斗香

二十八日 早約盛茂實林君昭早飯飯已周二公上次到

報親道院 次訪羅秀夫不遇回路盛公遣午飯 李行
簡同洪舍人載酒求書余已醉矣乘興作大字二紙客乃
去

二十九日 飯後訪郭元吉留坐門首看神會徐卷石盛八
四哥陳二哥布舍人曾克明俞秀才同集午麪

六月初一日 約盛茂實渡江 路學殿謁 劉茂實家就
手三酌同出解后雷將仕遣早飯飯已行至西津有人追
逐報盛茂叔乃尊歸遂不得成行時暑熱可畏過金山少
憩僧窗數酌而回

初二日 早起騎馬到江上盛茂實後至登舟絕江瓜洲換
船會劉舍人巨川之子 楊子橋午飯 午後至揚州歇
行李于茂實舖中 訪裴君得相邀小樓共飲坐客余及

茂實蔣善輔裴蔣二公求書 是夜就鋪中宿多蚊不得
寢寢

初三日 早茂實邀洗浴市樓早飯三品孟一哥同集 飯
罷趁舟抵邵伯 換舟晚至高郵 是日行舟兩邊淺水
皆紅白荷花行數十里不斷亦一奇也舟中有章武殿果
大師者同宿舟中是夜雖熱卻無蚊

初四日 早趁興化船載雨而行船中客多相與促膝而坐
二溝買飯晚抵興化登岸解后鄉人俞七哥引至詹廉
訪宅相見會劉巨川陳總把詹公令婿王時中令子詹德
潤待晚飯留宿遇晚蚊極多揮逐不少退比之江南之蚊
既大且觜利夜眠不敢揭紗帳也

初五日 寓興化詹宅 早投書與詹公 看況肩吾道所

畫山水況廣西廉訪司書吏也 黃仲文來都陽人也前
興化教諭陳升甫縣尉劉巨川亦至詹公相留小酌坐頃
就問黃兄都江事體 同巨川時中出游開元觀道士彭
南溟相接正殿塑玄帝人言兵燹時本縣寺觀多焚蕩不
存獨此殿巋然有欲焚之者錐其柱流血梁間光彩發露
畏之而止具以茲事刻之柱間事之是否姑勿論特彰神
靈耳余亦作禮而出 次登縣前譙樓此非通都大邑覺
規模少隘而縣官如詹雲卿劉漢臣王之芳三縣宰後皆
爲御史亦一盛事也 次游城隍廟有畫師王景山作鬼
神二堵差得 次游寶嚴寺觀新塑佛像 次訪許桂巖
俞七哥

初六日 寓興化詹宅 早訪黃仲文出所著理學源流圖

大率祖濂洛諸儒語耳 就見胡子貞臧子玄子玄子貞之妹婿也

初七日 許桂巖來同出到縣學揖 先聖見教諭李景恭陳總把載酒劉巨川同集 晚同王時中赴桂巖俞七哥之約 觀詹公所藏書畫

初八日 陳千戶來因識之 晚同臧子玄胡子貞游義阡寺次訪醫士李恆甫 觀歷代聖賢圖

初九日 寓興化詹宅 胡子貞送紙求書

初十日 寓興化詹宅 胡子貞置酒集於德潤客位坐者詹公余及黃仲文李景恭趙伯潛主人 時中求書

十一日晴極熱 李景恭趙伯潛二公置酒坐客卽昨日諸公 晚同王時中李趙二公造義阡寺長老密隱峯待茶

瓜云數年前曾于本宗主坐上相識云暑氣在在皆然雖
行野外亦無涼意

十二日 寓興化 詹德潤置酒亦昨日請公但添龔子芳
子芳子中之姪也居於高郵集散陪諸公到全真道院有
梓樹四株坐于其下以待風涼爲趙伯潛寫飲酒詩二十
首

十三日 爲詹公畫英石石不滿一尺許高六七寸奇怪特
異若神剏鬼刻無一點斧鑿痕也畫就招畫師王生來看
仍取椰瓢酌酒至午已醉 晚同龔子芳臧子玄許桂巖
訪李景恭于縣學會黃趙二公以隻雞斗酒席地而飲飲
散各歸

十四日 寓興化縣 劉巨川新醅初熟味頗純美早攜一

壺來與詹公共酌數行 午閒劉公燒二鰓載酒共飲坐
客余及黃仲文李景恭諸人飲罷胡子貞妹婿臧子玄呼
小舟約余及龔子芳徐昇之游荷花蕩趙伯潛同往少頃
詹公父子劉巨川掉小舟亦至盤桓片時入義阡寺寺主
具酒味不甚佳復登舟採蓮時日落風涼眾客多折荷葉
作盃傾酒不善飲者輒爲酒狼籍至月上乃還 是日甚
樂但多蚊敗興耳

十五日 寓興化詹宅 本縣宣差暗都刺同邢典史來
詹公置酒食瓜餠 晚與詹公坐橋上風月頗清剖瓜酌
酒

十六日 爲詹公書大字 午酌

十七日 寓興化 每夜酷熱出汗如雨興化之蚊旣大且

蜚利露坐閒著人如撒沙土然 晚巨川約至縣學乘涼
晚酌李口臧黃同集

十八日 寓興化 胡子貞李景恭王時中諸公相約到縣
學口黃仲文綵帳 晚熱不可當詹公撐船入海子乘涼
亦爲蚊所窘又復罷興 是日詹公出古銅敦上有銅馬
字兩行曰賢伯長宜子孫擊之有聲

十九日 胡子貞家早飯 夜雨少涼

二十日 爲王時中畫蘭 龔子芳臧子玄約于開元觀納
涼次造四聖道院約徐東溪徐昇之同余五人訪劉東庵
諸人醺飲門見荷花至暮乃歸 是日到縣治正廳扁曰
景范堂蓋文正公作宰于此云 晚催德潤辨乃事

二十一日 寓興化詹宅 劉巨川來共午飯 龔子芳徐

昇之買紙求字墨竹

二十二日 與詹德潤文字 詹公烹鵝爲余送路坐客余及胡子貞 邢典史來 爲德潤書韋蘇州詩一卷

二十三日 阿伴總領交鈔 李景恭趙伯雲知余將行送乾魚十斤攜紙一束求書畫 邢仁卿典史求字坐屏畫竹仍以雙鵝石麪酒樽爲送留李趙諸公假尊

二十四日 寓興化 今日滿擬登舟忽雨大作終日不止又留一日 徐東溪善傳神者攜紙二幅求竹 胡子貞以口字小書爲贈求題溫上人蒲桃并畫竹 爲詹公畫古木二軸畫已收拾行李

二十五日 早別詹公父子以柳瓢端硯相送復令王時中雨中送至河橋忽爲宣差拘船捕蝗託王時中到縣衙分

付乃得行 是日徐昇之龔子芳二公出船錢捌千晡時
至高郵府同龔徐二公游東岳廟歇行李于龔子芳宅
晚涼一浴覺神思頗清比之興化更無蚊蠅睡至半夜滿
牀月色

二十六日 留高郵府 早龔子芳同出游天王寺訪海長
老觀新起之閣子芳待早飯飯已同到府治過濯纓橋
次到府學揖 先聖學後有亭曰愛蓮錢淳父書也後有
文游亭燕五峯書陳茂叔建傍祠塑孫莘老秦太虛像
次同子芳市樓問茶 次過畫史張心鑒門問是鄉中人
留一茶出所畫閑看 次到徐昇之家昇之他出出門解
后龔子翔山長說十三年前相會時事攜登西番佛剎臺
殿偉甚子翔拉余到其家具午集出示徐熙畫紫口口牛

并書畫數種仍買紙求書十餘幅三子侍側長曰立夫小者曰伯牙兀夫其次忘其名也集散子翔送歸子芳家子翔所居曰仙居坊前有玉女井云徐昇之相尋不見送猪頭麪餅晚子芳烹鵝共酌立夫攜紙來求書子芳令弟同集子芳月溪之子也暑中延客禮意甚厚

二十七日早子芳相送出高郵城外登舟舟中早飯午抵邵伯換船雨大作不可上岸冒雨趁航而行湫隘之甚舟中皆匹夫無可語者卻喜風順晡時至揚州見盛茂實同到浴室洗浴回到其寓所具酒裴君得亦至共酌宿于鋪肆中

二十八日早裴君得陳仲明邀余及盛茂實市樓共飯飯已到通洞橋登舟舟中一僧曰善和尚金山禪僧也又一

客曰安奏差云是于參政門人差可與語午後抵瓜洲渡
江風濤可畏抵舍日猶未西

二十九日晴 洗衣

七月初一日 早路學拜殿 鄭鵬南僉事高唐劉總管新
官下學登堂聽張教講書儼如北方道傍之小說者斯文
埽地一至于此可勝歎哉可勝歎哉 余時與同歸到舍
下其茶 王四坊正者來喚蝗夫 見陳茂叔同上府見
段知事分付蝗夫事喚蔣子東省會放免 郎其之孟希
聖來 張藥山來 高子陽來 到張千戶家送小百戶
所寄之錢 訪郭千戶

初二日晴 出見高子陽 次到孟宅問綫 次慰章子實
乃尊君文司丞歿于慶元長山鹽場 回謁孟希聖郎其

之 訪焦彥明龔子中 曹彥博自安口賣米歸寓于玄
妙觀往訪之就拉曹雲厓到舍下小集

初三日 同五哥訪郭千戶商量買絹 到孟鋪下買綾定
錢 同五哥到沈宅 曹雲厓曹彥博來相約午閒會于
玄妙陳和父來到玄妙東廊乘涼曹雲厓具午集予及彥
博潘玉溪道士同酌 西廊邊亦坐會蔣竹坡高士坐頃
方韶卿亦至剖瓜茶各散

初四日晴 寫書發王二過揚州銷金 到學中會張仲舉
朱敬之于公右方韶卿陳子南張藥山盛君錫何明二生
會閒口方老求齋發事二直學二司吏亦口 訪東高總
管陳茂叔口出 訪孟君澤父子

初五日 方韶卿來辭留飯 陳靜齋來范仁卿續至 陳

菊田來 林君昭來

初六日 訪盛親家公託買物不值 曹千二郎來 祀先

約盛親午集付鈔五笏上杭州買物

七月七晴 送染錢與孟宅 林君昭蔣君楚來 謙選中
維那來相拉上甘露寺攜魚酒酌于虎林首座房酒雖不
多味極厚數酌徑醉 翼子中來值出

初八日 侍親見茂叔爲許生事 次見段知事口口留午
麪會口用口見劉府判道詹廉訪致意 回謁陳靜齋會
陳子南 回謁張仲方會青陽四哥探問張仲舉不出
見郭元吉待茶瓜 訪堯葵軒不遇

初九日 早楊達道自金壇洪墓來同蕭君益相訪君益相
邀余及楊兄早飯于市樓 次同二公見孟子長教諭蓋

楊君新授丹陽縣小學教諭與子長爲同官 次到學中
會張教堯葵軒周石二直學張藥山盛君錫 爪郭千戶
絹錢不遇留其錢分付乃安 訪房石口 回謁陳菊田
邢毅夫來毅夫新除饒州雙溪山長聞之與鄱江相去
三十里他日赴任庶幾聲跡相聞亦一美事 作書招楊
達道來日早飯

初十日晴 早邀楊達道早飯期而不至者蕭君益 堯葵
軒來 本宗主送位牌四座求書 邢毅夫來

十一日晴 送所畫山水與伏虎林託轉寄謙選中

十二日晴 東高總管來 孟子長同張福口來 訪徐耐
翁朱敬之李山泉趙資深

十三日晴 滿道錄來陳茂叔後至邢四哥亦至二公去後

留茂叔午麪 訪本宗主會顏知事留茶瓜

十四日晴 早見毛聲甫爲趙生關省剗錢事

十五日 早路學拜殿朱敬之講書七月陳王業也同堯葵

軒先散 祀先 毛聲甫來 郭元吉來 張鄉司來告

齋發

十六日 陳茂叔來 周寬夫來

十七 到孟宅問染 過郎其之藥鋪乃口口湯戈君讓

同集 訪陳簪林

十八日晴 石國寶知房來請來日公宴

十九日天壽聖節 路學隨班 公堂錫宴三品 范仁卿

來爲照籍事 龔子中來浼書二籤 章子實來謝 戈

君讓同焦鄭毛三令史來見

二十日喜雨 范仁卿來求保牒待牛麴

二十一日雨 常州蔡德甫遣惠老寄書來爲道日事

二十二日雨 到張敬之家付詹德潤所寄平江書信 早

發惠老行 到路學會石周二直學張盛二教諭張仲舉

陳茂叔是日爲分付蕭令史墊范仁卿文書 次與茂叔

分路歸細雨過橋滑甚

二十三日 曾祖妣楊氏太君忌日祭祀 訪俞景仁病瘡

自杭歸問彼中事體 次到玄妙觀見房春谷會曹雲厓

茅存庵陳大師戴居雲 李行簡來 訪蕭景玉借縹子

乃知夜來弄璋之喜 訪朱良卿

二十四日 曾祖省元憫忌祭祀 訪陳茂叔 訪孟子長

雨作濕熱

二十五日 訪陳茂叔 次到學中問范仁卿文書會張教
朱敬之陳和甫周直學蕭學司 孟子長來值出 晚曹
彥博至自金沙留歇

二十六日 陳茂叔來 趙伯可遣王提控寄書來早飯
以茶麪見本宗主稿土木之工 見王伯玉知房 邢竹
堃來

二十七日

二十八日 早送孫子明閣中盛氏殯出鶴林門

二十九日 早到錄事司見王伯玉 次訪陳茂叔不遇
顏提點來

三十日 蕭雲心送扇求畫 見堵濟川不遇 見龔子中
會呂幹臣書吏章子玉典史顧漢卿奏差 蔡古梅來

李行簡來

八月初一日 府學拜殿迎接不講書 堵濟川章子玉周
謙夫來 范仁卿來 薛正叔自龍興歸來見 鄭子美
送紙求書

初二日 到錄事司 陳東村來 高子陽來 蔡古梅來
余與曹彥博留午麪 到孟宅爲綵帛事解后蕭景玉就
以所畫扇還之 到潘庵主道院還結子 到郭元吉先
生家以鈔十五兩託轉送與趙德璋還關省劄錢 到七
姨家尋蒜山乃子不值 俞和甫鍾國寶來見彥博同余
晚酌

初三日雨 朱良卿來借大字筆 爲鄭子美畫山水寫梅
花賦 陳秀才來 陳大師來

馬山言卷一
三
初四日 早到錄事司見陳典史 同謁蔡古梅不遇 同謁薛正叔不遇 蕭景玉來范主一舍人後至曹彥博亦至 同彥博到普照寺同謁興提點不遇張居士錢善友領登新閣具茶 晚同彥博見余繼善 次回謁范主一不遇乃伯仁卿相接 陳茂叔來留午麪 楊友之主簿來

初五日 到錄事司換牒 郭總管來 見陳菊田賀新遷 同謁朱良卿 余繼善來 是日錄事司見陳典史王伯玉孫君得

初六日 陳媽忌日祭祀

初七日丁巳 五更路學陪位祭 先聖先師 見范月觀 提舉時自湖廣來將赴北爲解納書籍之行 會客鄭子

美曹彥博湯定一秀期而不至者朱良卿

初八日 請陳大師來穿珠冠 趙資深來陳菊田朱敬之
續至盛伯真令子亦至同茶 晚見范月觀提舉付文書
次見陳三舍人新授營田提舉

初九日晴 趙伯可遣王提控寄書來爲道日事 到錄事
司同五哥出見張廷玉不值 次見堯葵軒擇日 買金
紙解后沈國器邀茶 到孟宅催綾緞 鑽觥冠只用火
燒鍼攜往匠者鑽之巧言索錢甚多小人趁利一至于此
晚見俞景仁 回謁朱敬之 趙資深來求保牒令見
響林同作保狀

初十日 早送碗盞孫千二提領殯出中土門 陳提舉來
小酌 同五哥見張廷玉候脈取藥 張福四郎來修堂

後門限裝修書院窗子通作三間

十一日雨 曹千二耶來道孫同知致意見留眞州明日登舟不果見也時自黃州任滿云 五哥熱嗽走馬尋張廷玉遇諸塗拉回舍下用藥

十二日陰雨 盛親家自杭州發花朵冠盃口物來者

十三日陰 張泰齋來爲小弟看脈并求詩

十四日陰 早到館驛前聞潘御史到解后蕭君益同造隱居藥室共茶 鄭翔遠來 見茂叔值出 到學中見陳教石剛中朱敬之等聞之宜差出屋 翼子中來說浙東近聞 回謁鄭翔遠以字二幅還之 晚曹彥博相招余及景德長陳三哥同集德長善吹簫酒邊作數曲可聽

十五日 早府學拜殿 潘御史何萬戶劉萬戶蘭溪宣差

石總管宋同知高唐劉總管等官下學解后新引道知事
是日庾琴隱講書 靳引道來 曹彥博議花氏之親
相招小飲坐客子及曹雲厓陳孟二兄 茅六官人遣外
孫惠柿子 孫七白沙上來

十六日雨 早到館前 次問蕭君益免役之文 次見陳
舍人問石灰 曹彥博下定相招坐客余及曹雲厓陳西
巖孟正夫仲同弟是日袁叔明來自金壇報李伯康抵此
借屋歇行李余諾之

十七日雨 表叔呂四一教諭忌日祭祀 李伯康來會于
客位

十八日風雨 焦山寶都寺謙維那來 夜雨

十九日雨 以詩送別曹彥博并託買羊會李伯康袁叔明

兩作驟寒

二十日 先祖朝奉憫忌祭祀 以詩送還張泰齋父子會
堯葵軒 問候羅宣慰會宋同知堵濟川童子玉出門解
后楊有之趙岳甫 到孟改之鋪中會高子陽 到學中
無人乃出 訪范仁卿乃知提舉公十七日起程赴北矣
烹雞留午飯招客李伯康袁叔明 回謁伯康到蕭譯史
宅不遇

二十一日晴 見王伯玉不遇 艾主簿來 陳靜齋來

二十二日晴 俞景仁來謝昨日禮上直學 陳菊田來陳
叔後至 堯葵軒來朱敬之續至

二十三日 張藥山來 早得曹彥博書 見靳弘道不遇
晚發官保下金壇齋免役文字與本齋東湖天隱

二十四日 早雨中饒州李山意相訪話鄱江事 訪菊田

菊田來同出見陳茂叔議斫墳木事 還過杜五官人

門首解后盧千五郎同茶 李山泉來

二十五日子時九月節晴 早到錄事司 張仲舉來 曹

彥高自金壇來袁叔明具晚酌 趙宅王提控來

二十六日 到學中押保張仲方關子轉申總府陳菊田解

后于學中同出行至京口壩上丹徒縣尉司前相陪道墳

木事 以申狀與張仲方不遇 二十五 早見張仲舉會趙

資深張公留蒸餅 晚見陸洞之 景德長來 李伯康

蕭舍人來 李山意袖紙求作蘭竹 訪高子陽

二十七日晴 金壇趙君買茅叔叔來 上城隍祠卜籤

李山意來 晚李伯康蕭舍人趙茅二兄具小酌集于後

屋

二十八日晴 陳菊田來 訪靳弼道不遇 龔子中來

二十九日雨 李伯康袁叔明辭歸金壇

九月初一日庚辰 早到路學石侯拜殿 張教講書鄙俚

之談不可聞遂出 生日壽麪 發請期僕物往常州

小酌 晚見陳舍人爲石灰事 會楊三郎眞首座烹魚

小飲 新濂溪山長苗懷德同張仲方來見寄至吳江万

教書

初二日 辛巳好日 路學拜殿 同茂叔到濂溪書院送

苗懷德禮上會諸士友欲送仲方歸以馬滑不敢前也

青陽君輔來 戈君讓景德長來說明日焦彥明禮上淮

海小學教諭 同謁龔子中相留數酌午麪趙心甫續至

初三日微雨 早到淮海送焦彥明禮上會休寧典史張德明王仲祥童子玉蒙古朱教授及諸公常州請期

初四日 李行簡來 攜香紙弔房文一官人大令愛 晚見陸生不遇 次到倉前尋趙宅船

初五日 同長弟到王庫 趙心甫張仲方來 還李四郎口錢 周寬夫來 陳靜齋來 早到錄事司 午後二

走卒至

初六日晴

初七日晴 早到錄事司 寫聘儀啟狀

初八日晴 到孟宅取紅斑及雜物 曹彥高歸金壇

九月九晴 王主管來酌之以酒 祀六神 午後趁湖溪趙宅船載聘儀下金壇仲方弟及諸僕同行舟中有妝金

黃待詔 帶月夜半宿丹陽

初十日晴 早發丹陽晡時抵湖溪見趙景明及趙伯可昆仲 景明留晚飯宿歇

十一日晴 寓湖溪趙宅 早景明取騁物看過令閤逐一點對整頓 午間寫禮物狀 景明具酒午集坐客水北潘子秀余及王敬仲仲方弟趙伯大 趙東湖自縣中歸劉仲明續至茶罷仲明拉至其家觀新起後堂九間穿堂三閒書院內具酒晚酌坐者潘子秀趙東湖余兄弟 去歲余作竹石於仲明書院石民瞻題其上飲罷陪東湖踏月而同

十二日晴 景明待早飯飯已收船二隻陪景明往常州一舟載諸僕及聘儀一舟景明及余兄弟共之是夜泛白鶴

溪月落浩然如白日也景明烹雞具酒舟中小酌比住舟時已夜半矣宿道士橋

十三日晴 四更行舟 午前抵常州 余到學中見盛虎林先生 景明到錢府 仲方弟將聘儀到蔡德甫家見盛先生相接一年之別如轉首也乃子季方乃親二施兄出見具小酌晚飯留宿于教授廳 燈下出示伯時人馬精妙圖四騎作走射狀生氣活動又出舜舉倦繡圖伯幾詩卷及陸實翁手帖

十四日癸巳晴 趙景明仲方弟發送錢府聘儀 寓常州路學盛教授廳 盛先生具早飯飯已借馬同盛季方游玄妙觀看新起三清大殿偉麗可觀 次見李叔敬待小酌李兄鮮于伯幾之外孫也令余受禮 次到尼寺看子

昂古木 回歸寓所趙景明蔡德甫在坐德甫不知予到此也景明相報已收聘禮中有多荷景明維持是日二公辦事小倦借馬送歸 晚盛先生待酒蔡德甫載酒肴來共酌蔡公去後余與盛先生對飲至二鼓 是日盛季方出紙求書

十五日 常州 費剛叔來見 陳亨甫學錄陳道夫教諭周若虛張玉田章德遠來 景明來商議姻期數事議已作別登舟蔡德甫送別于學前車二堰 晚帶月宿柵口小舟容席坐臥不便所賴者天晴若風雨則不可

十六日晴 早發柵口 午閒到家已上出外八日並喜天晴

十七日晴 早送河三官人母氏殯于登雲門 訪陳菊田

不遇 訪滿道錄 訪郭千戶不遇 回謁焦仲明 回謁盛季高不遇乃姪相接 訪湯秋厓留小飲蕭君益俞韶卿續至續尊共飲及暮乃歸

十八日晴 湯秋厓來取荔枝合齒藥 元復初文學齋肇詔書經過令人相請走馬至丹陽館見之會眾官 次陪元公見竹真伯參政同行者姚推官劉經歷宋提領靳知事 口人上馬送出南水門余以步行不可往故止之

楊有之主簿來陳菊田續至小酌 夜風

十九日晴 驟寒可挾纊 早到錄事司吏輩不出閤子者在 回至府前解后趙心甫張仲方許桂巖同張趙二兄到林耕甫紙鋪一茶 見陳茂叔 歸家飯後出見陸動之不遇 訪張廷玉會松江陸悅道紹興錄事曹彥卿朱

元度 馬過郎其之門首解后堯葵軒王芝山共茶 李

千戶林千戶王聖保來

爲王子琪墓牌事

哈班郎中陳茂叔來

二十日晴

驟寒

孫君得來

寫關文爲貢德成屋事到

學中見張仲舉乃子張國祺石剛中蕭學司 以文書二

冊還陳茂叔三勺乃婿徐舍在坐馬過忠祐祠門遇孟君

澤問乃子丹陽近況待三勺洪耆宿續至 以路學申牘

見馬彥實外郎 次見張仲方不遇楊以吾相接 晚見

朱良卿會陸靜居吳成甫 曹彥卿來

二十一日晴

薄寒

二十二日晴 見陳舍人會來舍人三酌分付孫七事 以

手卷送七哥宣差赴武進宣差 訪林君昭館主沈國寶

求書大字邀入巫氏園庭小酌 晚訪郭千戶 次見陸

洞之 陳景昭干路學求米作書託添力

二十三日晴 早見王伯玉 次到方七姨家送方大師人情 寫盛元仁先生書七哥宜差三勺 會陳舍人同出到陳舍處三勺 孫君得來

二十四日晴 訪靳引道知事 次見孫吏目不遇 到學中公堂與直學輩坐久之 訪陳茂叔 訪李總把留數酌

二十五日晴 早到總管府見馬彥實 到錄事司 飯後到學中見張仲舉次同仲舉見茂叔不遇 次見東高伯昇總管張公先去 高侯留坐求書素屏風哈班郎中高唐劉總管陳茂叔同集具午飯 李行簡蔣用和來值出 孫顯卿來值出

二十六日晴 苗懷德來青陽君輔續至 茅六官人大令
似來 訪菊田以易簡方還之

二十七日 出見郭元吉 次見張子新 次見曹彥卿不
遇 到方七姨家見祐大師 訪章同父會章帥幾就付
謝趙景明書 見王伯玉議乃事 次到千秋橋陳書鋪
門首有北客出書數種賣下馬一觀解后張輔之 夜風
雨

二十八日雨中侍親老上墳

二十九日陰 陳靜齋來 早約盛親家陸大使午集 次
約陳東村二酌

三十日雨 陳東村來謝筵 王二王七皆王子琪知事之
子也以松木大牌求書乃尊知事墓扁攜酒肴至時趙心

甫相訪同飲 王二議姻 盛親家送斜皮鞋材併京棗

一合

十月初一日 早雨中路學拜殿 張教說書余入淵源堂
與石剛中輩少坐不及詳聽

初二日雨 滑不可出 陳茂叔來錄示新文 章同父來
青陽君輔來言新得本學小學教諭 余繼善作書借
馬鞍不及應命 為謙選中作山水枕屏 陳景南來

初三日 早出見張子新為閨子事 次見曹彥卿 肚餒
急歸 到錄事司見王伯玉 見陳東村會蔣用和 回
王七哥禮煎魚小酌 訪孟君澤 李仁卿來 孟良卿
送貢德成房屋府帖來值出 晚以府帖送與孫君得
王君德邀茶

初四日晴 薄寒 陳總管來 訪良卿會石剛中 東高
伯昇總管郭千戶來陳東村續至

初五日晴 謝盛親家不遇 訪滿道錄 陳典史借馬
雲谷來求書

初六日晴 馬彥實睦君玉二人來求書樓扁曰心遠留早
飯乃去 同小弟見蔡炳三哥不遇 過郎其之門留茶
次見張泰齋會邢子正北方之醫者泰齋爲小弟診脈
到蕭令史家分付府劄乃尊相飲 到學中請二石直
學分付俸米事 陳行之相約小飲 次請洗浴
初七日晴 官沙小半來 謙選中同萬壽先維那來取山
水小屏去 斗香

初八日晴 陳菊田來作山水

初九日 李提舉來 滿道錄來 到高橋 到學中會直
學輩次到甘露寺下問羊 次登寺訪伏虎林首座煎楚
小酌 送鈔陸拾交還盛親家公煮餅三酌吳三哥小弟
同集

初十日晴 早半伏七來領去買羊錢伍拾貫 到錄事司
見王伯玉爲買屋事司存坐久候塾文書 訪本宗主
教化國公下世普照撞鐘 同季弟見童子玉問祭羅老
事次見堯葵軒解后楊有之主簿

十一日晴 取染 買紙

十二日晴 早同季弟到五條街看羅都水出殯 到路學
尋蕭君益分付鈕佃租事次見王伯玉送弔挂四紙山水
獨幅 陸靜居同知來以獐猿圖典錢酌以三盃 晚見

見俞景仁言俸米事路遇盛壽一哥邀小酌以酒惡辭出
十三日晴 早到馬市見松江衛山齋治中會童子玉王宣
使 到學中爲鈕眞二欠租事關學追徵見張教會陳東
叔楊古性及直學輩 訪東高總管會哈班郎中亦刺馬
丹千戶李總把林百戶魏仲素都目 訪孫顯卿不遇
訪良卿會范仁卿相嚴二兄 范仁卿來 伏首座來寫
中峯和尚蔡林說 同季弟見張廷玉候脈 次見蕭景
玉會顧宣使

十四日晴 陳行之送羊 邢毅夫來 訪菊田良卿 房
共辰來 趙伯可自湖溪來歇于客位

十五日晴 早路學拜殷石總管下學 俞景仁直學講書
日俞教諭非名正言順之義 待趙伯可早飯 先妣憫

忌日祭祀已到墳所燒紙 陳元吉典史來石民贈續至

林君昭攜手卷三種來爲巫兄求題 孫顯卿徐威卿

來二公皆軍中吏目 到方七姨家欲送保住學裁縫

十六日晴 陳靜齋來 趙心甫張仲方來 曹彥博來自

金壇亦歇于客位 到路學發饒州儒學關文照闕期會

章子實同到倉前尋錄事司吏輩 晚同趙伯可曹彥博

登普照寺閣錢知庫待茶季弟同行 晚以一尊待伯可

彥博

十七日陰 到學中過教授廳見張仲舉會趙心甫張仲方

時菊田同行

十八日晴 出見張廷玉不遇 次到王仲祥家見張仲方

先到淮海見趙心甫不遇乃子相接 與趙曹二兄夜

話 送關文與君益

十九日晴 祐大師來 見張仲方索墨竹會李仲陽王仲
祥趙心甫 訪廷玉又不遇長弟同行 陳行之約飲于
潘店至晚乃醉

二十日陰 滿天雪意同伯可彥博聯轡到萬壽寺訪謀無
略長老 次訪因無礙首座出所藏書畫閑看 米老墨
跡一冊計四幅 米老書琴詩澹乎無味中指下清音發
□□□□空山墮涼月歸尋英光集檢之不見 東坡
墨跡 參寥子書東坡海棠詩後有辨才師及李方叔
題跋三公字跡皆學東坡 圓悟禪師墨跡 張孝祥墨
跡 陸放翁帖近世溫上人能畫蒲桃者作字師放翁
參寥子書海苔古詩 吳道玄涅槃圖羅漢九人作涕淚

悲泣之狀看已上馬 到因勝寺訪昂鶴峯長老留五酌
訪陳子野外郎延坐園亭小集坐客金壇李副使余及伯
可彥博

二十一日 陳菊田來 出見張仲舉教授 長興丁君耀
來取鈔二十五兩 會客陳子野趙五官人趙伯可曹彥
博陳行之湯定一哥

二十二日 早伯可彥博賦歸及余起時已上馬矣 金壇
趙君質來寄章共之詩 陸靜居來三酌

二十三日雨 湯定一哥歸金壇付王敬仲書 盛親家雨
中相招坐客陸大使余及周二官人杭州王一郎

二十四日晴 出到學中 次分付夏姓納苗 訪孟君澤
五條街解后茅六官人孟希聖相邀小酌 訪焦彥明

二十五日 先叔憫忌 孫君得來說許生被箠 訪陳茂
叔會哈班郎中 次到府前問折白米事 楊達道自洪
墓來 送米

二十六日 送米五石五斗與夏家納苗 到學中 訪王
提點留坐久之看江西晏生雕觀音 訪邢竹埜 陳無
逸教授赴澧州新任同乃親趙煥道趙心甫過訪留飲至
暮

二十七日 楊達道來伏虎林首座後至留二公早麪茹素
飯罷達道言別託寄共之書 虎林以紙求書永明壽禪
師誠語圭峯座右銘龍門三自省 孟君澤來三酌 趙
宅王主管來 滿道錄 茅六哥令似來

二十八日陰 作宋同知詩 和昂鶴峯詩韻併寄石民瞻

江西黃省堂來

二十九日陰 陳行之邀小酌

三十日雨

雲山日記卷下終

元郭天錫手書日記墨跡四冊始於至大元年戊申八月二十七日止於二年己酉十月三十日并閏月共十六閱月逐日詳書天氣之陰晴寒暑人事之往來酬答委曲瑣屑靡不備盡所尤詳者遇飲酒必書求書畫者必書所觀書畫必書所游寺觀必書稱謂之閒寢譏寓焉感歎之際義理昭焉細讀一過如見其人之性情心事而與之周旋談笑於十有六月之久也天錫墨跡傳世已少此冊行楷細書妙逼松雪翁四冊凡三萬餘字逐日書之無一懈筆真海內尤物屬樊榭先生曾摘鈔其客杭日記吾友鮑以文曾刻入叢書第一集中非全文也余於乾隆己酉之冬以大米行書赤壁賦易之於揚州汪竹農兄旋爲吳杜村同年借觀去冬復來游揚

始獲索歸十二月十九日作武昌之行因於舟中錄成
副本藏之行笈甲寅元日舟泊九江安邑朱葆淳記
余少具書癖聞父執屬樊榭先生有手錄郭天錫日記
未克一見既爲吾友鮑淥飲刻入叢書然僅客杭一卷
惜當日樊榭未錄其全也今春密友宋君芝山招余小
飲出手錄全帙見示酒邊展卷狂喜不可遏攜歸靜讀
覺朋友之往來風氣之好尙歷歷在目不啻追隨古人
于朝夕而數十年所未遂者於是大暢天下事殆有不
求而自得者耶芝山云此書宜贈淥飲以廣其傳蓋淥
飲所好篤所校精而且勇於從事余因急命長男之玉
日夜鈔錄行款悉依原文閒有字體草草未能識者芝
山僅據墨跡不可不闕疑也錄成急以遺之時嘉慶庚

申春日錢唐趙輯靈跋於竹影盦

嘉慶庚申四月初九日錢唐趙素門先生鈔贈知元蹟
在宋芝山先生處十一日偕周松泉五兄訪芝山於翦
刀巷寓館以真蹟不在行篋中出手鈔副本見借卽趙
本所從出也袖歸舟次校勘竟日五鼓次大麻始畢記
此以誌良友之惠 廷博

雲山日記跋

元郭天錫手書日記四冊真蹟原在揚州程氏雍正乙巳厲樊榭客揚州見之錄其中客杭事以歸未全錄也至乾隆已

酉安邑宋芝山

葆淳

易得真蹟於癸丑年錄爲副本嘉慶庚

申錢塘趙素門

輯

復從芝山借錄以贈歙縣鮑淥飲

廷博

自是四冊真蹟始有鈔本可以傳觀錢塘丁松生善本書室藏書志有精鈔天錫日記一卷爲勞氏丹鉛精舍藏書蓋卽傳錄之本光緒丁未丁氏八千卷樓藏書載歸江南此日記在焉板心題曰雲山日記余以江督端忠敏之命領江南圖書館事因得逐錄析爲二卷爲之雕播其書始於至大元年戊申八月二十七日止於二年己酉十月三十日并閏月共十六閱月逐日書之人事酬答靡不備盡芝山跋所謂如見

其人之性情而與之周旋者誠有味之言也自元克江南畸
人逸士浮沈里閭閒多以詩酒玩世元貞大德以後稍出儒
黃以淑後進天錫於大德閒一鎮江儒學學錄耳戊申至江
浙行省求充學正山長所志不遂已酉五月始得剡授饒州
鄱江書院山長詳是月十日蓋是時天錫三十歲矣天錫年五十六見於
俞用中天錫文集序序作於至正十五年中有天錫子啟曰
不幸棄諸孤今二十餘年矣從至正十五年上推二十年為
至元二年丙子序文謂二十餘年是天錫之卒最少在丙子
前一年乙亥姑以乙亥為年五十六上推至至大已酉為年
三十也余別有鄆天錫年事方壯所抱未能酬也故其言
歲考略詳橫山鄉人類稿年事方壯所抱未能酬也故其言
曰郡學歲收四千而為鼠輩竊食令人浩歎何時假我以權
為吾徒吐氣耶已酉三月初四日日記其自傷身世之意固已情見乎
詞此俞用中序天錫文所以謂仕不稱其志也惟此記十六
閱月中其在里居者及十閱月潤之耆舊皆在往還而梵宇

琳宮又靡所不造謂與諸僧說詩氣味相投勝章句之儒

至大二年二月十一日可以想見其逸致其經行關閣高橋修馬鞍

至大二年四月十一日千秋橋陳書肆有北客售書

九月十七日知彼時市廛之盛在城內漕渠一帶也又記所遊有巫氏園庭

至大二年九月初六日孫硯山園園中德符堂曾置局整理財賦

至大二年二月初八日志無所記也又記本路學正吳良貴婺州浦江人

而至順志十七學正無吳之名也又記王思善被軍人捉酒

犯禁凌辱於道

至大二年五月十八日至順志卷十七教授王公進字師善嘉興人大德九年三月至

則元時軍人之橫可知又記元復初文學齋肇詔書經過鎮

江事

至大二年九月十八日可以補史傳之遺

元史元明善傳仁宗居東宮首擢為太子文學

不記此事又馬祖常元公神道碑至大戊申仁宗養德東宮公首被簡拔授以直郎太子文學是吾鄉舊聞

往往見於是記誠足寶也惟天錫真蹟自芝山錄副後不知

流傳何所趙素門跋卽言原文間有字體草草未能識者芝
山僅據墨蹟不可不闕疑淥飲跋亦謂得素門贈本訪芝山
借真蹟不得但借得其手鈔副本校勘趙本云云此則校錄
之餘想望原墨余所引爲深憾者也巳未仲夏月三十日庚
戌丹徒陳慶年跋於傳經樓